

四庫全書

子部

欽定四庫全書

翰苑新書別集卷四

劄

代與曾參政

方秋崖

某伏以天地兌說稻雨欲涼恭惟某官訐謨帝庭妙參  
元化歸然舊德格于皇天海宇阜康六氣以序鈞侯動  
止萬福

某竊惟一德元老端笏品廊恢張時邕天同神比風雲

之會與國匹休陰凝陽和要不出燮理之圖惟聖天子  
儀圖黃髮方以二典三謨之盛仰之宗工敢願公相愛  
不貲之身如金如錫如圭如璧以畢能事云某仰惟皇  
上奮發英武旋乾轉坤陰霾劃開洗光日月爰立舊弼  
盡出獨斷於惟公相優游綠野復出而與二三大臣緝  
熙元功八荒一雲物一蘇醒聲氣之感天地開除內前  
宣麻縉紳舉笏相慶

某身在遠外邇魁袞以自快蓋上以為朝廷之賀而下

以為吾父母國之賀

某筆凡墨陋安能藻繪文字贊頌對天之休竊謂公相  
自常布時抱吾夫子仁義之澤禮樂之具對延英鋪繹  
之臚句初傳太史奏日中五色蓋以極天下選矣黑頭  
秉政霖雨滂漉而乃卷岱宗之澤御風騎氣與造物者  
游聖化一心中外日夜徯大老來歸為國著蔡中台焜  
耀太平之期可跂矣某庶幾見之

某畎畝愛居以謂皇上養聰晦明於不作不知蘊積渾

融更十寒暑一旦動盪振拂駕風鞭霆有不及掩耳者  
皇乎休哉非漢宣帝唐太宗所能跂已方今收召衆雋  
拔茅彙征大陽朝升羣慝自伏然小人為國病猶癰疽  
之為身患羸豕躅躅金柅係之小人之勢孤矣而童牛  
之牯欲剪於始萌否則安知其不狙伺於吾旁乎狐既  
獲矣隼既射矣若遽然不虞則伏戎於莽升其高陵彼  
將伺間而乘也伏惟公相堅持之以至天下之泰

某嘗謂國家講恢復之說餘百年於此蠢茲讎敵天怒

神怨亦既腦余吾髓沙幕矣敵何為者狐鼠晝噪意者  
不能不少勤丙夜憂顧某嘗攷北戎自唐僖宗時隨朱  
耶赤心討叛勛蓋咸通之九年十年也厥後李鵬兒又  
以北兵復京師則其鷙悍殘忍見於中國亦且三百四  
五十年事會之來無有終極百餘載間滅遼滅金而今  
茲又將滅韃某雖不敏尚能磨浯溪之石作大唐中興  
頌以歌聖君賢相事業

甚至不肖方公相以天地為爐人人物物盡歸橐籥往

者望赤舄於翹材之館六符熒然不圖分絕百僚而所以慰藉之者甚寵九鼎一言自雲霄飛下某庸有以藉手于經畧監丞調護此來丕載陶鎔之賜有懷感激浩蕩如江

某分邑萬山間井落數家聚耳氣象葦然無以大異於嶺雲關雪之外初見父老未知何以撫摩凋瘵上恃鎔冶端有化工大鈞無垠萬象春氣某區區歸倚之心雲天在上某仰止鈞庭迴在峻極豈敢冒昧自干不韙之

誅惟當恪恭官箴以無負驅策

代與喬樞密

方秋崖

某伏以天地委和玉露凝瑞恭惟某官訏謨基宥開張  
時邕道叶乾心永綏宗社鈞候動止萬福

某竊惟陰陽密移於八極之表其機緘斡旋實在上宰  
道化之妙一身自有天地方將采明堂月令使天下不  
出燮理之囿於消息何有某窺見洪造如此

某嘗謂君臣會逢之際蓋有天人交感於其間精神一



堂無疆惟休是為天下之泰豈偶然哉相公一德元老  
格於皇天典冊揚庭正位樞極都俞吁咈與參天下大  
政伏想綸言誕告公門省戶縉紳喁喁舉笏相賀吾道  
幸甚某嘗歎士局於用至不知兵必有文武之兼迺能  
自任以重吾夫子粹然禮樂之宗主而夾谷之會聲光  
燦如此固儒者能事也然則疊兩命以踵拜中外知有  
為之秋矣金鑒草麻亟正魁軸某尚切遲之

某恭以文明之世禮樂之用粲然實維一二真儒緝熙

大典倚歎休茲六氣以序三光以齊亦既繩金而縷玉  
矣永惟經濟之畧具見於洋洋大對之初蓋上不負天  
子下不負所學吾宋之陸宣公也某竊有比擬僭不容  
誅

某窮居讀書嘗竊有歎以為四譯無百年之運國家有  
十世之讐事會方來天怒神怨旌麾所指噍類靡遺則  
既報我祖宗在天之靈綏我中原遺黎之望矣此皆相  
公密勿天造執神之機運動天樞洗此氛翳迺知真宰

彌縫密妙決非蒼生所能測識甚盛甚休

某翦翦諛聞知誦相公之書餘三十年蓋大父尚書辱  
出相公榜下士方仗憑慈恩之舊沐浴華暉獨某塊  
之中不翅草芥執贄而望赤舄如隔雲霄六符之光  
照耀參井某惟有屏息

某仰惟大鈞之播無間洪纖一氣所春茅甲自遂某  
是以得不棄於化造之外然以蟻蝨微賤坐通名氏  
于光範門時謂之僭交代受迓於紫垣而為之大者  
不能修

鵠閣之敬時謂之慢僭與慢皆罪也而與其慢也寧僭  
某俯伏惟謹

某惟分絕峻極豈當冒昧不韙寅想天樞崇邃維石巖  
巖與國同休式燕禔福

某牛馬走之力不足以奉飮今誓當靖共無負器使

代與史督相

方秋崖

某伏以韶光之半春老丹萸恭惟某官入覲于王都俞  
清燕筆參政秉盡護師干鈞候動止萬福某邈江而東

敢以顯冊揚庭為天下賀

某嘗讀唐宰相世系其間銘彝鏤鼎蓋有不再傳者惟  
元勲巨德有大勲勞於王家則名卿材大夫往往萃於  
其門殆天意也天固生之必固相之此某所以不敢請  
節宣于茵憑之有司者

某惟聖天子厲精圖治蓋將六五帝而四三王臨御於  
今其朝於伊訓夕於臯謨者郁如也乃睠西顧則有袖  
周公大平之書而越在外服者邊鄙於何而寧謐廟社

於何而尊安必如龜卜燭照而一二數矣馳四輩而驛  
召之至則對中秘之庭漏下十數刻君臣之遇於斯為  
盛蜀先主之與諸葛武侯其劣諸

某聞古者文武無二事孔子也而有夾谷之會周公也  
而有東山之詩其巍巍煌煌至今光於簡冊者真儒之  
效如此皇上作文侯之命付相公以天下大政而使之  
盡護諸將意固有在也蓋唐之討淮蔡四年矣帝有恩  
言相度來宣則開明堂以坐治之耳鋒蝟斧螳實非盛

德事伏惟詩書之所滲漉仁義之所漸磨要皆吾聖人六經之用也甚盛甚休

某五年于淮鼯鼠之技窮矣時當多事使吾君北顧而隱憂則繫誰之罪也雖不以賊遺君父凜凜此心而折箠以笞羗夷挽河以洗兵甲其將且奈何哉日夜冀投之兵樊以毋敗乃公事

某自制下之日嘗東望拜手而言曰維天維祖宗克相有宋世祚名輔愚不肖似如某者何幸親見盛舉謹件

副墨如左蓋上以為宗社之幸而下以幸吾私也

某於德門尊大人之嫜抑子姓耳敢不敬問起居狀而請其所以條約者

代與史參政

方秋崖

某伏以春之莫矣雨逗花寒恭惟某官從容基宥之庭參決鈞衡之務神天閭懌華夏底寧鈞候動止萬福某謹遡泰階六符端笏以謝典史氏

某惟天以宋克肖其德誕開熙明篤生英儒與世立極



將使以太平六典禮樂皇家覃及龍荒沐浴帝澤是為  
有宋迓續億萬年無疆之休命咨爾司鼎為國棊共  
其恭以皇上英武睿明慨然南面而歎志未嘗不在中  
原也旄頭塵彗羽檄騷騷夜披輿地圖問天下何時定  
久矣乃睠西顧驛召一賢發冊臨軒晉參國秉士大夫  
動色相賀以為越衛兩王前日未既之功名端待今日  
舉明主於三代開壽域於八荒在此舉矣其蓋嘗操觚  
為國家賀

某愚且不學所不敢忘者先公教忠之訓耳遭時艱棘  
鼯鼠之技易窮顛閭者誰乃使君大夫其盱食也受詔  
西援幸解重圍然退省其私且不足以謝過而奚功之  
云忽奉綸函顧以大司寇印綬褒借而寵光之恭惟皇  
上風厲之恩相公薦進之造際天蟠地不可殫紀抑某  
非其人也惟有惴恐

某昨陳免牘且述君臣大誼猶子事父孰有以幹蠱為  
勞績能家邀功賞者乎天一從之期得請而後已夫是

以不敢據其感刻之萬分一從門下吏以謝不圖五雲之朶春韶與俱雖淮山介在邊寒頓有生意某也則惟顙之泚

某惟二三執政大臣也典章文物覓絕百僚駢儷四六之文殷勤五七之體不宜謙遜於邊外之一邊吏謂當重綈十襲悉上送於中涓而某懼其瀆也永寶之以為子孫藏某仰止鈞門何啻隔弱水三萬里九霞飛佩同燕春祺若曰啓居何如某奚僭之敢

代與史大參

方秋崖

某伏以惟暮之春霽景韶秀恭惟某官妙參基宥道叶  
乾心謨明弼諧與宋立極鈞候動止萬福某謹件畫以  
謝翹材之掌書記惟六符委光焉

某恭以表采陰陽佐天子以洪範九疇者二三大臣道  
化之運也若曰列鼎自重云者滋贅然越王衛王之所  
授受荆人楚人之所戴慕要皆以無前之偉績仰成真  
儒相公宜愛不貲之軀以畢能事

某迺者聞皇上夜坐宣室慨然有久不見賈生之思驛  
飛庾牌外數千里召公於黃鶴入對中秘相得甚懽一  
都一俞而天下事定矣其將作臯謨說命為萬世開大  
平覃及窮荒同我文軌蓋伊尹自任之重如此地天之  
泰在茲一舉甚盛甚休

某惟姬公作周六典實鳧鷖既醉極盛之時也文中子  
窺見其精微以為治家治國治天下具是書矣如有用  
我者朞月而可今幾百年纔遇公相坐于廊廟出冢宰

之緒餘以與吾君上下其議論一轉移間而乾清坤夷  
已見治象粲然復興惜不令王仲淹見之有慨其歎  
某邊吏耳無故而進班承明綸綍之頒大驚羣聽此雖  
聖主激昂之微意明公薦進之盛心顧惟書殿隆名所  
以極儒生稽古之榮酬大臣久次之勞而某也何人乃  
在茲選一命而偃再命而僂三命而俯循牆而走其奚  
冒昧之敢某退自揆度既無以仰當恩除對揚天子之  
休命則不得輒弔其名氏以聲區區感謝之萬分一禮

也敢圖相公畧位貌於不有灑翰墨以相先榮光熒然如自天落某謹重綈十襲而識之曰世世子孫其永保之

某邈詹中台惟有屏息敬願老先生眉壽無有害與國匹休燕及翠蓬同一禔福

代與李參政

方秋崖

某伏以天地兌悅平秩西成恭惟某官祇召自東入參大政百揆時序鈞候動止萬福某敢三肅為天下賀

其惟公相表采陰陽妙贊元化蓋將以齊三光序六氣而工宰所繇出也若曰燮調鼎鼐云者不當徹聞政事堂之右聖天子眷求舊德垂拱仰成以茂建無窮之丕基敢願與國匹休畢此能事

其聞聖人以天下為度同此一仁彼其悍然執兵以與我從事於邊鄙則猶四體百骸膚革之不仁者也雖其痛切於身且不忍斷而殊之天生裔夷為中國限即有侵凌薰染蟠際然亦天民之同具智靈者耳其於父母



之懷蓋憐之而不忍怒公相啓吾君以聖人之度密契天心從容機庭都俞吁咈久矣鋒車輒覲圖任舊人孚告未終縉紳相慶曰社稷無彊之福其在茲乎願少須臾觀兩階干羽之舞

某試嘗論君臣會遇蓋有天人交感於其間張留成侯袖黃石公書論他人輒不領而漢高皇帝獨會以心此豈非神授者耶公相起蜀西南上見謂晚意若曰自三蘇公不作西州英傑之氣扶輿鬱積餘百年前日未既

之功名端待今日八荒霖雨望平治於期月之間內前  
宣麻正位台鼎眷思久已定矣甚盛甚休

某落邊州者越數年望天上羣公於觚稜之雲表何帝  
隔弱水三萬里讀公相除拜之冊輒與士大夫相賀然  
猶不得執贄以望赤舄而借席間函丈之地條其所以  
守邊者惟有飛夢不聞沅寥

某每思維揚枕江捷淮為古都會中興百餘載帥藩者  
凡幾人而戎馬騷騷民之瘡痍未瘳也濠流如綫深厲

淺揭雖屹然故壘蓋亦未易恃以無恐朝思夕慮凡力之所及者惟日不足今既十七八備矣亦惟廟堂切切根本之計當以次第條上

某恭以對敷休命之始機孔殷邊瑣瑣一有司不宜用小夫竿牘以瀆門下舍人然有德進而朝廷尊中外無不喜悅輒拾輿人之誦如此惟造化翁受之

代與趙大參

方秋崖

某伏以天地既春草木欣豫恭惟某官緝釐閭制玉帳

靖嚴有偉麟符兵民夷懌鈞侯動止萬福

某維天維祖宗克相有宋篤生元勲咨爾嶽靈夙夜受  
職其將冀宣帝澤與國同休某敢問所以調鼎護茵者  
某恭審顯膺月制誕告多方峻躋秘殿之班增重留都  
之勢若稽彝典式對宗儒實維富文忠之綏北庭范文  
正之撫西徼有此異數加以大稱自非勲德與侔不在  
茲選制除之日乾清坤夷某敬願公相肅稟廟謨益殫  
忠蓋

某仰惟國家以深仁厚澤滲漉函夏如天覆燾以養以容而維彼不諛負恃搖毒參旗并鉞肆戮鯨鯢江淮不波安樂含哺者繫誰之功深惟鄆謹之所以來歸蠻荆之所以自服蓋用儒之效如此所謂德在生民功在宗社勒之彝鼎書之旗常者不勝載也某思與天下頌之某每讀漢史見所謂山河帶礪之盟未嘗不喟然歎曰嗟乎已薄矣絳灌武夫鳴劔其習氣耳使胷中有古今何至是張留侯人傑也退然一山澤癯意者圮上老人

之書未可遽謂黃石兵法子房之與韓彭英盧異者如此伏惟公相沉潛乎義理奮發乎功名詩書所傳了然在目某僭誦漢事以布其愛助之區區

其一賤有司在垓北中不啻肖翹之細退自惟念公相雖禮均宰揆賈絕百僚然大無不包惟所翕受者大臣之能事也某用是以斐墨黥鈞造

某仰止九霞飛佩屏息以之其若奔走趨承之心有如

皦日

代與度侍郎

方秋崖

某伏以秋雲之澹桂壑香寒恭惟某官禮樂熙朝黼藻  
王度忠加啓沃有相蓋臣台候動止萬福某邇風泰階  
之符飛越轆轤

某聞君子用易之泰消息一身陰凝陽和不出吾囿惟  
繩金鏤玉方鳴國家無疆之丕休其鏘九龍翼以聲之  
適當今日猶覲金玉體府丹青太平

某惟皇上張漢天聲復周土宇北窮碣石西盡流沙乾

清坤夷一統無外方將挽天河以洗兵甲包虎皮而藏  
之誕開文明緝熙容典中禮和樂以節以序上下蟠際  
春融雨濡喙息跂行沐浴膏澤猗歟休茲時則我秩宗  
制作之妙已其咨爾伯維帝之休

某嘗謂三蘇公不作西州英靈之氣扶輿磅礴鬱積餘  
百年蜿蜒蜿蜒萃為瓌粹筆精墨妙拔國之華翳鳳騎  
麟儀我萬玉惟藻旒凝邃左臯右夔簪橐荷囊去兩地  
僅一武每大除拜之冊薦紳聳聞鵠閣歸然夙莫延竚



某摧頽甚矣亦惟依依一日之知恃以自壯仙凡夢斷  
如誤入武林源一望九霞飛珮終墮塵土回首閨風三  
萬里矣汗漫之游未知不舉手以謝盧敖否

某領邑叢山之底數家聚耳顧風作浪湧於海同波極  
目茫然孰我維楫敢寅緣先契緝其蕪陋之辭端笏以  
告下執事

某敢想蓬仙玉輯怡燕佳涼琳琅瓊琚中表夷懌若有  
可備馬牛走者共恪以之

與王吏部

方秋崖

某伏以作噩之春乾元用九恭惟某官於皇戟衛以先  
啓行山川駿奔台候動止萬福某敢拜稽首敬為里父  
老迎候於前驅者

某惟君諸侯以天子明命宅牧作藩麾符在行神百受  
職某不勝大願願用易之泰康濟吾身以及於吾民

某聞之昌黎公歛大州也刺史尊官也地望之重於今  
餘三百年矣戲下駕蓬萊之雲氣薄太微之星宿而辱

臨之制下之日所謂至清之冰大好之山相與動色自得意若曰繼自今田里其無愁嘆之聲乎某於是不以賀執事之得州而賀州之得執事也

某亦既以賀矣氓有進而言者曰吾州久凋瘵非復唐舊今茲歲比不入微君侯其誰撫摩之而天球河圖宜在東序恐君侯不吾州之屑也貝宮胎寒弄明月天綱下罩一日收某猶願少徐之

某往年綴末班幸甚得望匿犀於萬玉之表曾幾何日

負隔仙凡舉手而謝廬教第聞笙鶴之音隱隱在青冥  
間耳某氓也奚其攀附之敢

某一生狷介與世少諧乃從軍諮丐祠猥亦予壘荷鋤  
耕舍夫須襁褓固無恙也潁川得黃霸氓將賣劔買牛  
我有二天實同此幸

某日與耘夫蕘子處無能為言新使君之來筆荒硯蕪  
書所以後若其諗大嫺則僭越啓凡役則妄庸某謹畧

代與范祭酒

前人

某伏以維莫之春綠氣深窈恭惟某官道尊師氏流化  
三雍帝所睠加台候動止萬福某敢肅拜以為斯道賀  
某聞天之生賢也不數則其備有九德燮和陰陽一身  
之間自有所謂造化者在某不復敢為尋常竿牘之間  
塵滓聽思永惟聖天子所以設簾之意甚寵敬願金玉  
體府式對穆清

某惟漢唐以來老師宿儒以訓故專門者百數十家其  
尤大彰明者不過毛鄭孔賈二三子而章句之鑿去道

逾遠蓋至本朝濂洛之學取洙泗之日月而洗濯之於是孟軻氏以後之傳始有所統逮今又百幾何年矣聖上一旦以大司成趣公於虞庠詎曰月書季攷羣多士以角侮聖言之時文哉開人心於九法欲數之餘續斯道於六陰既剝之後意吾君之望國子先生者如此其輒誦所聞

某身落邊頭望羣公騎麒麟翳鳳凰於碧落之外蓋不啻隔蓬萊三萬里也屬時艱難赤白囊馳道上者羽相

及敵負戎馬定躁我長淮夜籌軍書率午漏下十刻比  
曉則策馬箠馳四郊矣以故管記無庇賤名氏士不幸  
當邊鄙之風寒又不幸遭時事之荆棘倚筆三歎

某技止此耳岌岌然自危之以為財竭而府庫空兵寡  
而營壘空民流而田野空向使賈太傅生此時不知幾  
流涕幾慟哭也朝奏而暮報可竊以為遲而脈絡不貫  
通手足不運掉為邊臣者且奈何哉執事與二三大臣  
彌縫密勿亦得無寒心於此否某願與聞

某四年于淮憂時之髮已班班然雪矣追數其過司敗所不貸也而上恩誤及進直西清章七八辭不得已而後拜寵褒之渥與天無極然所以禦寇者不在是某才輕責重夙夜惟艱

某寅想九霞飛佩之仙郁穆於閭風者裕如也某不敢以請而敬問其所以條委者

代與丁察院

方秋崖

某伏以天地之肅蓐收司聲恭惟某官鶚立朝端霜凝



臺簡讜言鯁論炳炳如丹台候動止萬福某邇風烏府  
敢條其所以為朝廷賀者

某聞國有著蔡山川空藏陰凝陽和上下蟠際將使蹇  
蹇諤諤為紀為綱以壽我宋億萬年無疆之休膺鼎  
羹願少加之意天下幸甚

某竊惟皇上養聰晦明一瞬十載淵嘿高拱無聲無臭  
殆如春霆久蟄發則奮厲震迅不及掩耳陰雲解駁大  
明劃開乾清坤夷纖埃不翳於是曩時城狐社鼠仗馬

轅駒一洗而空之蓋歐陽余蔡之在言路也宗社靈長  
繫此盛學

某伏惟剛大之氣充塞天地不吐茹雷厲風飛汲直  
在庭奸膽驚落皂囊數十疏剴切上當帝心意若曰有  
李勉而朝廷尊是知天下不可一日無儒者之論正色  
山立內陽外陰此吾宋之一泰也顧惟經濟底蘊堯薰  
舜釀謨明弼諧有政路在

某退自惟念上厲精如漢宣帝欲寓內無一愁嘆之聲

偃室宓堂維卓維魯祈雖斗辟縣意必在海涵春育中  
某何如人敢辱銅墨若曰安問狐狸庶其免矣栢臺在  
望毛立骨寒

某往年望瑤玉之光如五雲絢爛非煙非霧流景浮空  
泥蟠天飛惟有屏息區區依憑一日之雅矜以為榮染  
翰操觚晉干臺制

某賤有司耳其於九霞飛珮曷隔仙凡惟當祇畏簡書  
奔走先後

代與袁大監

前人

某伏以天地既春草木欣豫恭惟某官使華焜耀對敷  
帝休臺制靖深台候動止萬福某敢不端笏為吾道賀  
某觀頤之象竊謂起居以養形消息以養氣操存以養  
德贊育以養人則所謂金玉體府為國保綏此吾黨至  
願惟少加之意

某望紫垣奎壁之間榮光熒然占者曰是謂魁躔將有  
以鴻筆麗藻陶鎔帝皇舒翹揚英玉我王度者出未幾

而皇帝御集英殿親擢公為第一在廷薦紳舉笏相賀  
曰今之董仲舒也蓋幾何年於此矣某惟有虔敬

某恭審茂服帝俞緝釐匠事併載董狐之筆入刊司馬  
之書伏惟歡忭某竊觀祖宗盛時凡上所親擢者時謂  
儲相不十數年間告庭大拜不自意公今日而以繕監  
召也然則所喜者端人登朝衆正其彙征乎某豈勝延  
跂

某以世祿得官一俗吏耳然逮事先尚書見其訓誨諸

父得聞慈湖絜齋兩先生之學即其書而讀之者有年  
矣某官以慈湖之傳嗣絜齋之道嚮其以吾道自任  
當世不一二數某安得執御以驗吾心之本靈本明者  
某奔走節下於今兩考而餘幸而大父於先正有同朝  
之喜季父於執事有同年之盟抑人有言長於伯樂之  
廐生於匠石之園而不見取則信為不材下乘矣惟先  
生拊之使薦紳大夫目之曰是當登蒙齋之門某倚以  
為重

某屬吏也不敢上仙輯之問條教所及某願趨承

代與蔡總帥

方秋崖

某伏以秋聲未涼稻花晚秀恭惟某官於皇玉節風聳  
江淮臺制靖嚴清寧翊亮台候動止萬福某盥淪神識  
九頓首而致稟函於節下

某竊惟天生鴻碩體備四時嘘吸卷舒蓋與造物者相  
為周流陰凝陽和固有不容若某屬吏也其敢贅以請於  
鼎裊之司存者

其聞之諸老往年紫垣奎壁之間榮光煜然占者曰是  
謂魁躔將有以鴻筆麗藻舒翹揚英者出未幾而尚書  
乃為南省第一太末羣盜所謂必蔡司直來我輩洗兵  
歸田廬者蓋文昌的傳也某之生晚不逮事文昌何其  
遭逢猶辱在乎崇臺牛馬走之下列邇詹符采惟有屏  
息

某竊謂國家深仁厚澤滲漉函夏如天覆燾以養以容  
而孽芽其間負恃搖毒我師北指亦惟腦沙幕髓余吾



矣今茲強敵新與為隣不能不上勤丙夜憂顧輟名德  
以總鑲意固有在然天下不以是望公也小之則紫霄  
玉清筆宣皇澤大之則太微天柱神會帝謨惟天子之  
休命

某碌碌不武亦嘗操觚弄翰相與逐鹿場屋間而藐然  
一青衫不能以文墨取歸而眊吾詞林之衣鉢顏其甲  
矣一官落南化碧之腥猶在不圖班引得瞻天日之光  
分邑窮山凜若淵谷維我獻簡公之訓忠肅公之節為

子若孫者不敢忘伏惟撫存之盛心嘉前人之忠而不覆之某其何幸

某贄名之初謹件副墨如左敬至而無文語莊而不綺肅使者而祝之曰庶其徹於電巖乎蓋其恭且敬如此某仰止蓬翠如隔雲霄寅想瓊玉因依芝蘭郁穆下邑凡役覲稟成模

代與何總卿

方秋崖

某伏以南風之薰水花娟碧恭惟某官妙幹吾國如漢

蕭何有斐冀宣台候動止萬福某謹三肅復命於典史  
氏

某惟王人握數路財賦盈虛之柄蓋國之命脈繫焉山  
君海王時節啓處調肺鼎鼐作宋寶臣則區區善頌云  
者庸何贅

某疇昔之日有薦紳大夫毅然纓其冠而前賀者曰朝  
廷驛召何少卿為西總矣少卿負一世之望蚤游邊城  
知軍戎萬里情而才又非劉晏輩所敢望當今貔貅野

宿日增竈未已也士飽而歌馬騰于槽以相我皇上麾  
荆南之幡而滅此敵者其不在少卿乎某得之師言敢  
不以告

某東相也公西總也壤地之相去固有間矣脈絡所在  
則痒癢疾痛舉切吾身遭時多艱事會無極所謂同舟  
風波胡越相救猶左右手之日也敬願節下毋彼毋我  
以克成共濟之勲俾某得自附旗常竹帛之間抑何幸  
甚

某所自慶幸者然耳獨聞之道路則謂一代偉人當從容萬玉之班吾君上下其議論四輩其在行矣蓋期其入者曰式遄其歸而覲其留者曰毋以我公歸兮此二說也而一說也繇後之說則某之私

某四年于淮憂時之髮幾雪矣敵負戎馬足信然有飲江之心此何如時而使不武若某者以身當之賴天之靈宗社之福徃徃不得志於我靡夙靡夜磨礪以須亦惟忠於國家者之所教誨

某輯輿人之誦如左而告於門下舍人曰蓬壺其惟襲  
慶乎蕪城其無委役乎謹拜手以請

與李國正

方秋崖

某伏以湖山春老花雨未晴恭惟某官對揚殊綸辦嚴  
入覲吾道增重台候動止萬福某敢不敬與諸儒同一  
引領

某惟君子以吾心為太極以吾身為乾坤其動靜闔闢  
蓋有妙造化而難知者則凡所以存變理寄經綸於一

寢飯間某焉用禱

某聞國家以科目取士其上三人者多不十年取卿相  
文章事業磊磊掀天地而執事者獨袖晁董之策三入  
幕而未休豈冲天驚人固在不蜚不鳴之後耶某實與  
薦紳大夫歛衽焉

某比讀除綸竊審妙簡魁彥入為師儒辟雍斤斤如熙  
春臺而風舞雩也聞之道路上方拊髀而歎以為公等  
安在何相見之晚必將貯之雞翹豹尾取以自近意者

其金華朝夕說書乎其恐非二三子所能留也

某記望匿犀之年當是紹定元二間與全監抵掌談兵處也老我未脫場屋而台座之禮樂三十字亦尚留竒胃於今幾何年適相值於太學人生會合之難如此留落不偶姑置之

某往年佐淮東軍以口語觸前宰相之怒三年牛下蓋已謂休此生矣乃春弓旌四出亦與招徠不學無文倚席負負惟下執之所以教某其書紳



某賤且卑不圖金薤琳琅駢四儷六而賜之書捲錦鯨  
還之則所不敢乃盥薇露焚瓊蕤而告之曰前驅將以  
何日次脩門乎某將望塵以拜

與葉秘書

方秋崖

某伏以春臯雨足澤澤農蓑恭惟某官夙戒屏星克佐  
藩輔台候動止萬福某敢不敬為父兄子弟賀

某伏想題輿戾止練水皆春仁聲洋洋山意翔舞其所  
以調娛鼎烹者惟謹某用不以黠侍巾櫛者

某惟歛雖偏小然古稱大好山水州也騷人墨客其寄  
奇寓逸猶在晴嵐暎翠之間執事以東壁一星辱臨之  
此邦其何幸

某聞禮部第一人自當不出帝城取卿相豈有翱翔羣  
玉之府校讎太微之庭而猶以半刺史分風月乎名在  
御屏會且召矣

某自別行在所無何以憂歸去冬外除亦嘗一望翹材  
館矣枯枿難春亟返吾故鉏煙耕雨我有二天則亦未

為不遇

某拜手敬想年家尊大之輯流慶演迤或或綦綦  
某亦恐麥坡桑隴之外諏爰民瘼惟所以命

代與江西陳漕

方秋崖

某伏以春野雨深倣載東作恭惟某官肆殫忠蓋玉節  
於皇元穹冀宣台候動止萬福某謹遡江而西興敬於  
侍御者

某寅想西山南浦之春雲暖而乍寒雨新而驟霽所以

調肺饗膳者眠時益加謹伏惟將明隆指之暇少垂意  
焉以幸僉囑

某竊惟聖天子奮發英武獨運黼黻乾端坤倪軒豁呈  
露其敷玉璫於丹宸鏘瑤佩於文墀皆端士也薦紳相  
目以為搢華崑圃冰碧藻曜如先生者不二三數飛驛  
自東奉尺一詔而歸有日矣故不敢道蕭何關中故事  
以請於節下

某睇簷璇極仰斗宿之光寒拜手稽首而起敬者感蹈

如也蓋自昨歲贅詞于筦記者今復見春風矣眠吾篋  
衍有琅畫在時一薰爐而讀之如侍函丈

某不武書滿者餘半年至今迂代者三蓋其初為墮甌  
再為棄帷而今所與交承者又在嶺之南曰曲江三千  
里而遙雖其疾驅而至恐入夏秋之交末路煎熬虛老  
歲月惟先生幸教

某敢問師門蓬仙之眷恭惟燕喜洪郁蘭玉翹秀某門  
弟子也非僭

某伏恐巖邑有可備驅策者某奔走先後

代與高漕

方秋崖

某伏以霖雨霈如稻畦蘇醒恭惟某官使華焜耀風聳  
江壖臺網靖深天所開右台候動止萬福某謹端笏為  
朝廷賀

某聞之曰通天下一氣耳爛為慶雲聚為景星流為醴  
泉灑為甘露而其在人者是為盛德君子蓋天地之至  
和也某願節下葆此至和以幸一道

某竊惟國家如天覆燾丕臣萬方彼强者敵乃自甘於  
範圍之外願天悔禍亦既犁其庭掃其穴而寢處其地  
矣然新敵挾方張之毒侵我邊鄰中原憂未歇也貌貅  
野宿萬竈雲屯使吾儒胷次有甲兵則鞭笞之易耳夫  
是以屈六轡而東之某用不敢薦聞鄭侯關中故事

某思蜀士惟無出出則器能政理卓然如諸葛武侯躬  
耕南陽而天下事固已龜卜燭照於草廬中矣方節下  
以西州第一人入對延英漏下十刻蓋上見謂晚也願

及大有為之時建立磊磊掀天地事業磨浯溪之石椽  
筆大書以傳無窮某與拭目焉

某嘗攷彼部自唐僖宗時從朱耶赤心討叛勛蓋咸通  
之九年十年也朱耶赤心即五代唐莊宗之祖曰李國  
昌其後李鵬兒又以彼兵復京師則其鷙悍殘忍於今  
三百四五十年矣事會之來無有終極百餘載間滅遼  
滅金而今茲又將滅彼伏惟飛輓之暇所以討論其故  
者詳某輒贅言之以裨幕府末議



某不肖似蓋自去年之八月已及戌瓜代者每參差一至于此今所與代者又在嶺以南迂人之往幾何時計當壓境矣某雖旦夕去客其詎容簡於祝

某載以崇臺爰案某視九霞飛珮天人也惟有屢息教條所及某猶覲趨承

代與方提刑

方秋崖

某伏以梧風既秋以暑滋武恭惟某官皇皇麾節民以清嘉丹筆流春高厚申錫台候動止萬福某敢齋宿奏

記瞻邈使垣以冒聞于典史氏

某竊惟天地扶輿之氣鍾稟人英負陰抱陽和粹流浹  
顧惟斯人愛助之意猶覬冀宣天緯金玉鼎饗一道幸  
甚

某恭讀國史見寬大之書為民而下者十八九未嘗不  
嘆曰我朝以仁立國期於無刑非惟萬宇皆春沐浴帝  
澤而際天所覆罔有一夫之向隅者吾君之心其天之  
心乎夫是以揭節平反屈六轡而東之堯有臯陶好生

之德洽民薰為泰平布在謨典甚盛甚休

某聞蓬萊隔弱水三萬里風引孤帆而去莫近翠雲此  
某所以未能簸弄明月之珠頡頏飛霞之珮也然嘗從  
薦紳大夫後知其琳琅翰墨擥秀瑤林使鞭鳳咎鸞羽  
儀萬玉謂當朝元圃而夕崑崙矣綠綈夜下尚切遲之  
某聞惟兵與刑自相表裏寇賊奸宄蓋作士者事也班  
孟堅志刑而不志兵亦竊取之矣玉山藩輔一卒崑謹  
禽獮而獸雉之無難者皇帝若曰公有甘棠在焉移鎮

燕凝將紛然騎竹馬而迎於境何以弄潢池之兵為恭  
惟廟謨天運神化

某以世祿得官一俗吏耳然雪窻燈火之夢未寒也身  
墮嶺雲之外衣履瘴腥朝家憐其艱辛賜以班改自謀  
不審分邑萬山間地瘠而民貧未易摩撫二天丕覆敢  
不件副墨以修告至之恭

某仰止翠瀛如在璇極屬邑令有屏息而已若以職事  
奔走洗手敬承

代與王提舉

方秋崖

某伏以金穉而柔涼宇未肅恭惟某官香凝清燕玉節  
於皇庾臺靖嚴百爾宣冀台候動止萬福某端拜為斯  
民賀

某聞盛德君子者天地合氣陰陽委和其神淵澄其德  
至簡其猶覲凝情滌慮混和天倪使國有宗儒黼黻河  
漢豈惟善類之幸

某竊惟聖天子膏澤寓內如歲之春迺者下寬恤之書

所以愛養元元者至纖悉也根蝨節蠹疏剔剷除當宁  
慨然猶以常平使者為重意若曰俗吏富國既而國富  
而民貧國貧而民亦貧矣其能均齊斂散以壽我宋千  
億年無疆之命脈者其惟吾儒乎夫是以屈六轡而東  
之甚盛甚休

某望紫垣奎壁之間榮光熒然占者曰是謂文明將有  
以鴻筆麗藻陶鎔帝皇舒翹揚英金玉王度者出未幾  
而皇帝御集英殿親擢多士公時雖在第五而廷紳之

相賀者曰杜牧之乃為第五人何為不廷魁也蓋幾年於此矣某惟有虔仰

某以世祿仕藐然一俗吏耳顧雪屋之燈書味固無恙而諸父詞林之衣鉢其牙籤之插架者猶足以玉我為也迺碌碌不武落其家聲斷梗漂流墮在梅花關月之外僅以自脫法當班改而為縣忝冒來此則氣象葺然無以大冀於嶺南聚落心之憂矣臍噬謂何

某聞之薦紳大夫以為天下無可為之邑正使陽城復

出亦付之六太息而已滌龜伊昉敢於告至之書而道其所然者伏惟節下加我獻簡公之勤勞王家憫我忠肅公之殺身不辱而施及其後人則幸矣某猶桑梓也輒私布之

某埃壘賤微望蓬萊隔弱水三萬里此非塵凡名氏所敢瀆惟條教之及某也趨承

代與趙判宗

方秋崖

某伏以霽景融春叙載農事恭惟某官殊庭怡逸願天



之情皇明受釐台候動止萬福某齋宿奏記惟高凝幸  
鑒其衷

某切惟天地合氣陰陽委和其神淵澄其德玉潤猶覲  
凝情滌慮混和天倪使國有老臣廉貪立懦則豈惟善  
類之幸

某辱在子姪事尊有彝謂當晨省鼎烹昏定茵寢於此  
心猶以為慢顧惟爵一德一齒一兼天下達尊之三而  
某也卑且賤其敢以書疏之數為禮

某聞士大夫養恬其館逸想自閑門下之士則必稱道  
裴晉公綠野之遊與謝太傅為蒼生而起故事以致其  
歸慕之萬分一若某則以為出處無愧進退裕如使天  
下聞伯夷之風一洗貪競其有補於世教孰多某竊深歎仰  
某試此巖邑不自意兩考而餘鼠技既窮百短呈露強  
弩之末如魯縞何安得老先生一言為我鍼砭朝夕以  
冀某其書諸紳

某幸甚辱與贊府公同寅亦既假寵矣天啟佳晤乃今

又得以批糠之政累吾明府公雅好愛重夫豈人只鯉  
庭詩禮某實與聞之以口語心庶幾自幸得以一拜靈  
壽之杖

某贊詞翠蓬之輯具嚴令判縣稟函中矣某奚瀆之敢  
苟有以教之唯所以命

與南康游太守

許子良

某伏以明庶風來生意開動恭惟某官千騎春隨惠氣  
劇拂百神給扶台候動止萬福某三薰三沐裁贊牘修

屬邑下吏之敬凜懼不敏

某竊聆朱轡皂蓋之東江頭騎竹兒童懼于而聲喜于而色莫不曰仁賢刺史之來天之所以福此郡也五世人浮嵐煥翠間亦且開顏一笑相迎溫乎其和可知矣某焉用贅

某恭惟聖天子丙夜不安枕惟元元本根宅生是究是圖謂康廬壤地雖偏小實朱夫子道化之邦數十百年間遺風餘韻要有以繼續是用分命我公移輪蒞止千

里之民幸矣敢再拜賀欽以某官當今文獻家宇內之士翹首想望不翅泰山北斗之尊朝夕論思日月獻納皆上所注意以道得民小試儒效政平訟理不占以孚匪伊選所表為公卿丕展先正經綸之蘊使天下知有喬木世臣顧不韙歟敬重拜賀

某無能為役早得從文肅公徐先生賢父子游迄今在門人弟子列每聆議論人物未嘗不推名門為斯世冠冤某所願觀賢人光耀聞一言以自壯者有時矣低頭

吏鞅幾負初心乃今何幸遂獲備太史公牛馬走引領  
下風此生不虛矣

某為吏非才辱知諸老先生望外脫選亦謂得百里地  
或可少行其學道愛人之志前年冬到官適承弊壞垢  
玩之餘逋賦糾役囂訟謾不可訾省而促中小性又不  
習為耐甿劬躬單力為之爬梳徒有好盡之累竟亦何  
益縣官分罷去久矣臺郡廉其無他既寬徹之又從而  
褒揚之用未滿謫敢謂際逢又得事道德宗工奉令承

教非造物惠碩而何語心自夸距躍三百

某俶貢賤氏名非文莫之輸寫何敢以庸謬廢祓滌簿  
書之塵課儷語一通百拜持獻擊轅鼓缶於黃鍾大呂  
之側惟唐突是懼

某仰首雲霄珠聯璧合祥光炳炳然知為德宇之符不  
敢僭躡申問敬奔奏後先屬令賤也約束頌下無敢不  
恭

與南康守游寺丞

余總領

某竊以巧雲障秋明河炯夜伏惟某官易地分符初令已熟神百其相台侯動止萬福

某惟建邦選侯眡印盼教在江山清絕之境擁堪輿滋至之休不暇贊祈居然泰定世俗贅請宜用畧之

某沂流而西徒積揚瀾左里之思真可望而不可到也  
旬朝至晁恨肉人

某欽以某官駕班才彥龍宸眷知上雍馮狨合在司馬  
吾丘之列半銅佩虎何止信臣杜詩之儔微發凝香畫



戟之吟健賞擘開青峽之景席不待煖綸已隨盼甚盛  
甚盛

某東淮餉領虛老周暮北闕敷綸濫陞漢省辭不獲命  
懼浮於榮無非餘映之可依更虞善後之當力尚期厦  
廣以迄玉成拜叩拜禱

某已辦謝襃遽枉華賤粲然橫陳虹燭元僚焚香虔受  
莊報有鼻又負潦鹵之慊耳等惟體鑒

某伏恐京口使令惟命是恭

與繆路鈴

方秋崖

某伏以韶風已暄丹莢成綠恭惟某官肅將戎旅於穆  
和旌休有冀宣台候動止萬福某謹斂衽以贊名氏  
某雅聞姓畧為國虎臣調膺鼎饗必有踴躍後先者誦  
黃庭二景之章稽洪範五福之疇某何庸贊

某與東加士友漱淪芳潤者有年獨執事袖司馬穰苴  
之書小遊塞上雖聲光如斗欠此一識每談當世雋傑  
某豈勝馳敬

某聞之薦紳大夫以為瑤林騫秀妙墨琳琅圯上老人  
乃以一篇相授受於夜半囊堯戟轟長我魏師此固在  
旦夕間抑靈砂圭刀換骨仙去又將泛八月之槎間訊  
廣寒之玉蜍也某敬竚

某家新安萬山之底退然一腐儒耳雖魁漕闈冠別省  
擢甲科而此區區者何益於世異時請學士賦詩脈退  
此賊政恐不滿高明之一笑某尚其勉之

某遡風醉亭飛無六翮大相不知其無似留畫帷籌毛

錐子安用哉實深感歎今幸得請其相從於林霏巖暝  
之外有日矣惟玉帳嚴靖俾二三子得安意於學宮即  
其受賜

其向者辱灑翰先之開闔一再謹伸其感且謝者如左  
九霞飛珮寅想郁穆翠蓬此有刊委敢請

與李司戶

方秋崖

其伏以蘋花風老寒入雁聲恭惟其官式對皇明元穹  
委貺台候動止萬福其謹三肅以復筦記者

某觀頤之象切以為吾身自有天地所謂五鼎芍藥兩箱擢揄者抑外也敬畧

某聞執事聲在楚東久矣春風輦路天幸辱分擅題之暉墨妙琳琅落我襟袖假其歎矣有懷玉人

某惟士方窮時望一第意其跨元圃登崑崙也而事有大謬不然乃今知耳如執事孤鐸文響手拾漢科今幾年何始為窮邊戶曹掾則某輩齷齪者其實之勿復道某謂今三連越在邊鄙抑聖朝舊服也休明之世猶使

蠻貊衣冠而忍置吾赤子之塗炭乎然則屈之民版願  
無鄙夷

某癯然一書生於幕府無能為役借籌帥屏安用毛錐  
子為塞草秋黃邊事孔棘如吾徒者要當束之高閣請  
俟太平何以教之某敢不紳佩

某伏想年家尊大之嫺郁穆翠蓬如有飢役于蕪城唯  
所以命

代與浦城鹿宰

方秋崖

某伏以秋雲逗雨桂壑香寒恭惟某官仁洽雉郊琴意  
閣暇元穹錫羨台候動止萬福某敢不為里父老賀

某觀頤之象曰山下有雷以山之生物而雷蟄之則根  
莖芽甲怒長而拔起君子蓋不獨以自養焉養其身以  
養人某猶願少加之意

某比讀除目切覩遄飛鳧舄臨吾父母之邦和氣先驅  
山亦翔舞漢制郎官上應列宿出宰百里其委寄至不  
輕也聞之東西行者宓賤之堂書簾閒靜而耕雨之蓑

荷月之鋤皆自得於歌謠之外某旣稔政聲矣

某自兒時聞密令為三公故事此固近世無有然延英  
曉殿鵷鷺雖雖琅珮瓊裾在帝左右如公輩蓋已簡注  
凝旒矣孰謂玉璫黃流之醲郁永壺朱絃之勁清迺猶  
未在鍾呂間耶式遄其歸儀我班著

某往年官越幸甚辱在寅恭代庖秋曹又忝交承之契  
一間何濶蓋自前之歲贅訊以來今茲幾缺然雪溪之  
舟蘭亭之楔未嘗不墮清夢也某倚筆飛趨



某謬庸無似試邑窮山之閒民貧歲饑百短呈露亦惟  
疇昔教訓無數無忘今幸已書滿代者來暮去心已馳  
然猶未知下里門之日也田彼南山吾實受廛焉豈無  
他人莫如我契舊某竊以為請

某寅想仙遊之聚蘭玉因依燕此佳涼多祺蓂或未行  
有翫顒覬刊垂

代與姚判簿

方秋崖

某伏以麥之秋矣風日清微恭惟某官輿衛在行啓處

嘉靖台侯動止萬福某敢不為前驅賀

某切惟吾身在造化之囿不息則悠久自強則精明此子素學也惟跋履勞勩某猶覲於鼎鼐留情

某聞之孫子嚴其言曰高士不為主簿而大夫君以寶為可士安得獨自高某意此公棲身枳棘間而冒次之蕭蕭者超然塵埃之外矣伏惟執事以劔津之光寒乃惠然辱臨之繼自今英材館增九鼎重矣某謹拜手延

竚

某嘗與有識共談天下士歎科目之陋以為重厚典刑如執事者其落筆為文章猶能挾國之華迺獨屈之南廊試耶或者天將大其聲名如董體仁故事則黃閣紫樞無不可者某蓋已誦言於甲櫝矣

某思昔夜窻之誨如信宿耳栩栩清夢笑談琅琳曾不自知其幾何年矣試邑青山之縣瓜熟而不得去意者天之所以惠佳晤也前輩老成人必有苦語以相鍼砭某肅襟袞之

某為邑長於斯今始五日京兆耳不圖謙下儷翰相先  
謹條其所以感且愧如書然不能訓執訊者萬分一某  
其知罪

某寅想九霞玉輯郁穆惟嘉百爾委條式顯刊曉

與趙仙尉

方秋崖

某伏以一雨勒寒花事未競恭惟某官仁聲先路民舞  
以歌台候動止萬福某敢不引領

某維柯臺山水妙天下真仙所故家凝英育竒多為趙

王所幾為鼎茵少留意

某讀國史見先正趙清獻公正色立朝至號為鐵面御史  
未嘗不歛衽三肅思見其人而不得思見其子孫喬木  
蔚然惟有瞻敬


某惟台座黃鍾大呂之函和清廟朱絃之勁直酸寒漂  
尉小屈矣意者雲入古廳攻欠孟東野詩耳鵲鵲飛下  
君寧肯留

某田家作勞晚事科舉抑區區者適為崇牛衣猶溫噴

有煩言歸尋月鉏舍者爭席如使村無犬吠某與受其  
賜

某見蘇長公道清獻公居有溪石松竹之勝東南高士  
多從之遊意甚慕之不識他日輟耕許從容梅屋聽話  
故家遺俗否某用敢以其名聞

某竊想羣仙天飛環珮冰玉某氓也敢僭興居



翰苑新書別集卷四

欽定四庫全書

子部

翰苑新書別集卷五

六五

詳校官中書臣康綸鈞

主事臣祁韻士覆勘

總校官知縣臣楊懋珩

校對官中書臣牛稔文

謄錄監生臣王宜



欽定四庫全書

翰苑新書別集卷五

劄子

謝張參政

方秋崖

某伏以金鞮秩序王宇尊涼共惟某官袞繡聯輝鈞樞  
對掌聖神睠倚穹宇給符鈞候連止萬福某熏香端拜  
寅控忱悰仰祈鑒答

某切謂千齡慶會一德交孚保合太和緝熙景福寶躬

勺令有喙焉容某謹屏息

某恭以某官以正學結睿知以清猷儀善類間兩社而  
為輔持衆美以效君興望具孚天允穆諒九筵之莫玉  
領百辟以奉璋遂正元台溥綏縣宇某加與旄倪拭目  
以登平某煙雨扶犁淒其七稔小夫竿牘何從塵滓黃  
閣之邃迺若泰階華暉被于品彙傾翹寸臆宵寐以之  
某夢冷釣天拙甘農畝叨恩偏壘偶縮戌期抗請丐祠  
趨行有命噓枯知自挈累遄征謹護本根冀碑駑鈍唯

是捐姿寡合弱植易搖尚倚燾容庶幾尺寸某勉思稱  
塞誓有捐糜

某再奏征埃以八月四日恪祗賤役隄詹光範摧謝何  
繇謹緝儼辭輒鳴悃悞辱賜榮擲億秭為榮

某仰止紫府遽崇霞裾縹緲仙凡夙隔詞問匪恭恐有  
骭驅拱聽劄下

謝丁樞密

前人

某伏以金顯平分碧虛如拭共惟某官彌綸天緯施轉

斗樞明睿瞻憑穹示協右鈞候動止曼福某薰蕕端笏  
寅控悰忱仰蘄委鑒

某切謂明良千載慶會一堂玉燭四時笙鏞庶彙願珍  
葆粹無待贅云某謹屏息

某恭以某官以粹亮結主知以和平主國論粵儀兩社  
密贊九宸歲闋寶稻之祥邊猷紅旗之捷風俗新嫩綱  
紀赫張竚陟鈞衡賢於夢卜某雖筆陋墨凡尚能賡一  
夔一卨之頌

某牛背夕陽淒其七稔分嚴禮絕之地何從以咫尺塵  
滓迺若泰階六符輝燭動植其傾翹寸臆宵寐以之

某憂冷釣天拙甘農畝叨恩偏壘偶縮戌期抗請丐祠  
趨行有命嗟枯知自挈累于征謹護本根覲彈驚鈍惟  
是狷姿鮮合弱植易搖尚倚帡容庶迹曠戾某勉旃稱  
塞誓有捐糜

某竄奏征埃以八月四日恪祗賤役踰詹光範摧謝何  
繇謹緝儼辭輒鳴悃悞辱賜電粲億秭其榮

金定四庫全書  
卷五  
某仰止紫府邃崇霞裾縹緲仙凡夙隔詞問匪恭恐有  
骖驅拱聽札下

謝林中書

方秋崖

某伏以序正金韞涼浮碧宇共惟某官禁疊綬從橐影  
林纓神聖睠憑穹示渠侑台候動止曼福某寅尺墨申  
控寸忱仰斲丙鑒

某切謂彌綸詞掖運動化權陰凝陽蘇孰出吾圉寶躬  
勺令請祗為繁某屏息

某仰惟某官鴻筆麗藻陶鎔帝皇舒翹揚英金玉王度  
蓋肩歐蘇而輩韓范者厥今穆卜吉辛合宮展采裁我  
奉璋顯相熙事將繇內相正位東垣黃麻告庭巖詹丕  
聳某尚切遲之

某牛背夕陽淒其七稔小夫竿櫓不敢入帝城匪嫚也  
迺若泰偕六符輝被庶彙某夙宵詹遡辦香勤卷

某夢冷觚稜分甘農畝叨恩偏疊偶縮戌期丐祠弗俞  
趨行有旨噓枯知自挈累于征第揣捐迂若為稱塞尚

金定四庫全書  
卷五  
祈容燾庶詭豪分某臨楮及茲負芒屨甚

某奔走征埃甫祗賤役推謝之幅躬叙何繇僭緝儼辭  
唐突兢惕辱賜榮電億秒其榮

某敬以藥珠縹緲瓊佩繽紛仙凡夔殊詞申則躡恐有  
驅冊拱聽曉放

謝邵給事

方秋崖

某伏以金顯秩平碧虛澄爽共惟某官望尊執簡寵壘  
批綸神聖瞻憑穹示給銜台候連止曼福某寅蠲只墨



申班寸忱仰慚委鑒

某切謂地峻螭頭班聯鳳沼清光采近冲氣為和勺令  
玉躬无俟於祝某謹屏息

某仰惟某官以粹舉結主知以魁望儀朝序頃躋繁路  
脩罄黨言邁陟清塗就顯論駁才足以制國事經綸之  
本識足以灼人才消長之機秩祀吉辛肅雖顯相疏恩  
旁午只天中樞羽翼瑤圖芬芳汗簡某枚舉盛事

某分席鷗沙七其稔矣隻字不敢入帝城分也非慢也

迺若柱史一星光連台斗某與樵牧旦旦詹依

某夢冷觚稜分甘置散叨恩偏壘偶縮戌期丐祠弗俞  
趨行有命噓枯知自挈累于征正懇狷庸若為稱塞尚  
祈容憐庶詭豪分某臨楮及茲負芒屨甚

某竄走征埃甫祗賤役權謝悃幅躬叙何繇僭緝儷辭  
唐突兢粟辱賜流電億秭其榮

某敬以藥珠縹緲葱珮晶熒仙凡夔殊詞申則躡恐有  
驅冊拱聽曉敏

謝章直院

前人

其宓以金天雲澹古桂歛香共惟某官雉監躋華鰲扉  
壘紱清寧拱侑台候連止萬福某謹齋明盛服玃忱于  
典記者某謂羽儀禁路只尺天光嚔呵奉觚何迪匪吉  
閑珍葆粹有喙奚容某謹屏息

某洪惟紫皇聿新治化號令風雷所以鼓天下之動玉  
堂揮翰手匪魁壘博碩誰宜為某官雅望瑞時懿文華  
國橫經資善懋績繕工簡在淵衷筆宣帝澤合宮殿壁

法駕執纓內相躋榮槐廳增重某尚切遲之

某牛背七稔絕意人間隻字不敢入帝城分也匪慢也  
迺若穿躔麗天輝燭品彙實與樵夫蕘子同一磨遡

某捐介不耦分合投閒恩予偏州偶然縮戍亟申祠請  
叨旨趨行馳驅服勞嗟揚知自第虞踈拙靡稱循良王  
所有賢海內蒙福某知免矣

某枯莎寒蛩詎應輒溷謫韶之奏然舍是無以立誠流  
電賜燭億秭其榮

某仰止慶霄縹緲仙珮繽紛敢贊而弗敢問屬有軌  
拱俟曉啟

謝朱殿院

方秋崖

某伏以顯金秩序鴈背風高共惟某官肅立副端兼榮  
邃幄九宸眷倚三極拱扶台候連止曼福某寅蠲尺牘  
庸控寸忱仰祈闕徹

某切謂豸冠穹峻鷺羽高華清明在躬寒暑受令頤珍  
葆粹無玷誦言某謹弗敢瀆

某恭以聖天子厲精責實以新內修外攘之政迺得冠  
偉光明之彥躋登龍墀以植紀綱某官以至公汲善類  
以直氣糾官邪開張時雍堅凝國綸吉辛相祀奠玉熙  
成獨步班心徑顙朝面某尚切遲之

某牛背夕陽淒其七稔帝城書問何敢昌馳迺若英躔  
麗天有目共覩某與樵牧旦旦傾翹

某夢冷脈稜分甘農畝叨恩偏壘偶縮戎期抗請丐祠  
趨行有命噓枯知自挈累于征正懼捐庸莫能稱塞尚

祈幘燾儻獲璧還某搦管及茲負芒屨甚

某塵土裝懷已祇賤役摧謝之惓躬叙無繇僭緝纚辭  
唐突粲電辱賜覽擲億秭斯榮

某敬以九霄縹緲羣玉晶瑩仙凡負殊申詞為躡恐有驅  
策拱聽曉放

謝謝右司

方秋崖

某伏以金鞵秩序風露粵涼共惟某官綜理都曹彌縫  
化軸紛其吉衛台候連止曼福某謹熏香雪頴肅忱于

典記者某謂晉躋台佐客近天光補袞亮工助鼎和味  
實躬循彛贊矣某奚敢瀆

某恭誦紹興英主睿訓曰都司學為宰相者也某官喬  
木之家猗蘭斯馥登庸衣鉢厥有親傳學之素矣迺今  
理內御外綱領中書開忱布公權衡宰路帝嘉乃績法  
從資賢佇踐世官以輝先烈某尚切遲之

某猶記泰階六符委照三十二蓮峯之地玉川茅屋家  
被華輝雖踈逖已來隻字不敢入帝城而日與樵牧詠



歌棠愛今如昨也仰丐矜體

某猶不通方泉石七稔一麾縮戎亟箋祠廩上未忍棄  
有旨趨行絜累于征祇役云俶行所幸玉季舊游善化  
有可取不矧慶雲英露輝覆而潤澤之乎某知免矣  
某寒落淒蛩不當以柰韶濩然舍是无以立誠流電垂  
灼億秭其幸

某仰止瓊樓玉宇雲氣高寒訶問為躡屬壘馱役惟命  
之共

謝大帥制使陳留守

戴象麓

某伏以矩令平分金天爽豁共惟某官帥垣山立宮鑰  
穹嚴華夷具瞻天人森衛台候動止萬福某三重九頓  
東向百拜潔蠲泓穎裁書申謝于星闕之下鑒在為榮  
某初筮惟謹副墨嗣申仰惟天以一世宗勩相我國家  
道義養浩精神折衝福祿無窮與國匹休嵩高烝民之  
詩某卷卷瓣香虔祀

某門墻舊吏里社寒生茲者恭承使閭驛遣郵筒於此

月十二日夜戌時遶奏牘一通舉某堪充陞陟到任使  
某盥手剪蠟焚香啟緘亟拜亟受銘心感佩當已謹具  
公狀申聞伏乞台照

某嘗謂薦舉良法古者以為陞擢人才之階後世反為  
私徇人情之地取士不觀其實績隨勢轉移薦人不攷  
於平時取決左右從古如此非今而然恭以某官詩書  
元帥人物宗師布公道開誠心不存形迹舉賢才赦小  
過无棄疎微收拾時髦於袋篋之中攷核實能於履紱

之際有所譽者得於已試心乎愛矣不以為遐悉出精神心術之感通不容文字言語之干請所以至微且賤如某者亦蒙甄陶曲賜收錄希曠之遇今古所无感極肺肝思生骨肉某无任忻愉激厲之至

某九年學製五技告窮寸步躋攀遷喬敢望末涂難阻息肩无繇賴有此天特為之地秋風萬里既首騰一鶚之飛春日載陽又詐信尺蠖之屈何修得此欲報若何自此愈當永肩一心一以報國家一以報知遇雖糜捐

不避二天在上幸鑒臨之

某素知先生以公道薦賢不容私謝某心以直道事上亦不敢效尤第稱謝有禮不可虛短啟贅誠無拙拘不腆宗匠一賜覽擲榮幸萬斯

某揆分崇嚴不敢僭申崇鬪珠星列緯之恭庀職微眇又不敢請約束驅冊之目惟有勉修職業以期元負師門夙夜匪懈伏乞台炤

交事謝江提舉

牟存齋

某伏以桐奏徽薰梅收餘潤共惟某官使葉望重郎署  
班高九重僊來三靈助順台候起居億福某寓忱觚牘  
申敬籤曹洪浚弗莊嬰玷是懼

某訶省之藝前列攸謹屬薰絃之初奏諒鈴索之多聞  
願冲隘於泰和用叨服於休寵式推家學以顯儒庸

某欽以某官以古人心為今世眼抉開宇宙千年之秘  
天相鷺洲拈出江山一段之奇人飲鴻筆端係人才之  
氣脉實為政化之精神英蕩輔函周爰咨度蘭香盈掬

趣奏明光如聞黼座之深知又在玉堂之瀑直少需出  
綽式想縉紳某遠游謾賦近戎已瀕衣裳主晉國之盟  
常遵壇令璧乘假虞人之道已視篆文雖拘涓選之辰  
尤切凌兢之懼幸憐來紱蹉跎之跡太展錦衾覆露之  
私告至之初抒忱以既某以賤事貴豈敢簡彛因文見  
情具嚴副墨謹以下俚已淫之曲奏之中天韶濩之前  
批筆之間汗顏可掬倘蒙矜貸實所懇祈

某敬問尊公某官共惟幙府高華繡綵輝映雲霞縹緲

之集風雨怡懌之間備福所覃真樂有味

某伏恐道涂或有委使力所得勉敢不敬承

翰苑新書別集卷五